

## Die Gsalzene

Bim Zolldeal hett dr Bundesroot welle yylängge  
Und em Trump statt Grönland Ziiri welle schängge  
Und schwupp hämmir denn 39 Brozänt ghaa  
Will sälscht dr Donald wott nit jede Boggmist haal

Oobe Stift und unde Lecher – das sig groob  
Die Queere finde Legostai dotaal transphoob  
Die Bilder miess me junge Mensche doch erspaare  
Wie sich die Hetrolegostai mitnand dien baare!  
Und sone Legokiibel irritieri seer  
E Hetroblyttlerparty ooni Gschlächtsverkeer!

Am 8. Meerz wird abgestimmt d' SRG z halbiere  
Was wurd e «Joo» bedytte? Mir diens expliziere  
Us «10vor10» wurd «5vor5» – das wär z'erwaarte  
Bim «Donnstigsjass» spille si nei mit 18 Kaarte  
«Landfrauekuchi» nur no Vorspyys und denn Tschau!  
«Einstein» wurd zu «Halbstein», nei wärs d' «Halbrundschau»  
Ai Vooruussetzig isch gää, das merggt my glyy  
Dert sinn scho wiirglogg gniegend Halbschlau drbyy!

S'Infantino-Grimpeli, das wird e Hit!  
48 Teams dien an dr WM mit  
Sogar Iran kaa spille – wär hätti das dänggt  
Drbyy hänn die doch s'halbe Nationalteam ghängt  
Fir Exoote isch das doch e Riisegschängg  
Hit kennt me Curaçao nur als Mixgedrängg  
Dä Modus duet Entwiggligsländer preferiere  
Sogar Italie kennt sich no gwalifiziere

Unsri Papis do – das wurd me nit erwaarte  
Schrybe dr Pin-Code ganz diräggt uf d'Kreditkaarte  
1,2,3,4 – dä isch so läppisch – s'isch zem gryyne  
Drfiir kunsch dodrmit diräggt in Louvre yyne!

Dr neii Phaabscht macht Bsiech und sitzt mit Lyt an Disch  
Dert wo Noot und Eläänd unerträaglig isch  
Er briefft vyyl schlimmi Ort, entschaidet schlussamänd:  
Zur Esther Käller und zum Baudepartemänt!

Grönland erobere – dr Trump hett resigniert  
Jetzt wurd s' Brojäggt schyynt's vo de Schwoobe wytergfiert  
Statt die Insle mit Soldaate z'okkubiere  
Wänn sie am Morge frie go Baddiechli blatziere

## Und no dr Monschterväärs

Bundesbeamti dert in Bäärn  
Schaffe nit waansinnig gäärn  
Vo Stelleaadritt bis zer Ränte  
Sinn die wie Wachkomapatiänte

Und sie dien niemols uffheere  
Sich wie Kingeli z vermeere  
Drum isch in allne Departmät  
D' Zahl an Niete oppulänt

Dert dräffe sich nit allzuelang  
Zwai Beamti uf em Gang  
Dr aint maint: «S' Lääbe duet uns strooffe:  
Du kasch wool ebefalls nit schlooffe!»

«Mi nei' Kolleg duesch noni kenne  
Liggd uf em Schrybdisch, isch am penne  
Dä hett's wirglogg gänz schnäll grafft  
Isch scho vollständig yygschafft!

Mir hänn e Jobbewäärber ghaa  
Wo fuul isch und rain gar nyt kaa  
Doch laider – s'isch e Sauerei  
Hämmir kai Kaderstell me frei

Im Militärdepartemänt  
Isch me feertig und am Änd  
Fuuls Personal und nit grad schlau  
Kai Stutz und Waffe fääle au

Dr Martin Pfister bruucht sehr glyy  
E vellig neii Strategyy:  
Wär unsri Schwyz wott attaggiere  
Muess gwissi Regle aggzeptiere!

Grieg am Määntig wär eeländ  
Will schampaar nooch am Wuchenänd  
Grieg am Zyschtig wurd nit goo  
Will denn sinn d'Dailzyter nit doo

Kai Grieg am Mitwuch - das isch glaar  
Wäg' Wytterbildigsseminaar  
Grieg am Donnstig ligdd nid dinn  
Will d'Lytt denn im Home Office sinn

Grieg am Frytig gäb vyyl Drugg  
Die maischte mache dert scho d'Brugg  
Und kei Froog isch schlussamänd  
Mir kämpfe nit am Wuchenänd!

Au d'Luftwaffe setzt glaar Limyte  
Kämpft wird nur zue Byyroozyte  
Mit Panzer wird – sind eich im Glaare  
In Innestedt nur 30 gfaare!

Die Situation kennt eskaliere  
Wie sotti d'Schwyz druff reagiere  
S' gitt nur ai Wääg us däre Noot  
Die Gsalzene in Bundesroot!